

Ex Minister President Balkenende ta recorda dr. mr. Mito Croes (dfm): **“Un homber cu vision, conocimiento y perspectiva; un sabio y un erudito”**

MUNDO politico na Hulanda a keda impacta p’e fayecimento di dr. mr. Antonio



Gordiano ‘Mito’ Croes. For di Den Haag, prof. dr. mr. Jan Peter Balkenende a comparti su dolor y recorda e gran politico Arubiano.

“Mi a conoce Mito Croes dor di a comparti cu ne diferente momento, tin biaha na encuentronan politico manera di CDA, tin biaha na conferencia y tin biaha na otro reunion.

Semper cune bo tin contactonan sincero: Un hende cu un mente habri pa mundo, un hende cu ta carismatico y cu kende mi a hari hopi. E tabata un homber cu un gran sentido humoristico; pesey mi ta recorda Mito Croes cu hopi afecto.

E contactonan cune tabata hopi biaha riba e tereno academico, pasobra e tabata bezig cu su scriptie titula: ‘E Redefinicion di Reino’ y di esey e tabata conta kico e tabata trahando riba dje. Tin biaha nos tabatin combersacion cu otro riba e cambionan estatal den Reino. Na mas cu un ocasion mi a papia cu ne riba esey.

Semper tabata bon pa scuch’e papia, pasobra e tabata un homber cu vision,

cu conocimiento, cu perspectiva; y tin biaha cosnan personal tambe.

Naturalmente 10-10-10 tabata sumamente importante: Tabata trata di un constelacion estatal nobo den Reino, un comienso nobo di relacionnan.

Esey tabata pa Aruba diferente cu p’e otro islanan. Pero e tabata enberdad un proceso cu nos mester a pasa den dje hunto.

Y relaciona cu esey tambe, frecuentemente mi a duna oido na Mito y con e tabata wak e cosnan. E tabata un hende cu semper a boga pa relacionnan gubernamental integro, cu por tabata critico, cu por a trece su opinion dilanti di un manera cla, y mi a haci bon uzo di su comentarionan e tempo ey.

Pa loke ta mi opinion di Mito Croes ta cu e ta un hende sumamente amistoso, e tabata carismatico, mi ta hay’e un sabio y un erudito. Mi ta kere cu hopi hende ta bay haya su falta. Mi mester bisa cu personalmente mi ta haya hopi tristo cu esaki a sosode.

Mi ta pensa riba Rosita, su casa y riba su yiu homber Pieter y demas famia. Na juni ultimo ainda mi tabatin contacto cune ora cu el a tuma su despedida for di Raad van State y nos a scirbi otro na e-mail.

E momento ey nos a papia riba asuntonan cu e tabata ocupa cu ne y riba e reaccion na su discurso.

Pa mi personalmente tabata un sla ora mi a tende cu e no tey mas. Nos ta bay recorda Mito Croes cu gradicimento y respet.”

Jan Peter Balkenende tabata Prome Minister di Hulanda entre 2002 y 2010 como tambe lider di partido CDA y lider di fraccion den Tweede Kamer. Desde final di 2010, Balkenende profesor na Erasmus Universiteit na Rotterdam.